




საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ვაშაძე მიხეილ სიმონის ძე



ვაშაძე მიხეილ სიმონის ძე [1(14). XII. 1908, ჭიათურა, – 30. VI. 1996, თბილისი], მსახიობი და რეჟისორი. საქართველო. სახ. არტისტი (1965). 1923-იდან მონაწილეობდა ჭიათურის სცენისმოყვარეთა

წარმოდგენებში. პროფ. სასცენო მოღვაწეობა დაიწყო 1926 ჭიათურის საშ. სკოლის დამთავრებისთანავე. 1926–67 იყო ჭიათურის სახელმწ. დრამ. თეატრის მსახიობი და რეჟისორი (გარდა 1931–32 და 1932–34 წლებისა, როდესაც ქუთაისისა და ხაშურის თეატრებში მუშაობდა). 1967-იდან ვ. თბილ. კ. მარჯანიშვილის სახ. თეატრის მსახიობი იყო. გამოირჩეოდა ფართო შემოქმედებითი დიაპაზონით, უშუალოდ, სისადავით, სინრფელით, მაღალი პროფ. კულტურით. ვ-ის საუკეთესო როლებია: ოთარბეგი (ა. სუმბათაშვილ-იუჟინის „ღალატი“), არსენა (ს. შანშიაშვილის „არსენა“), სვიმონ ლიონიძე (დ. ერისთავის „სამშობლო“), პეტრუჩიო (უ. შექსპირის „ჭირვეულის მორჯულება“), იაგო (უ. შექსპირის „ოტელო“), ოდიპოს მეფე (სოფოკლეს „ოდიპოს მეფე“), ბასა გუჯაბიძე (გ. ხუხაშვილის „ცხოვრება კაცისა“), ალექსანდრე ჩინჩახელი (კ. ბუაჩიძის „ეზოში ავი ძაღლია“) და სხვ. ვ-მ დიდი წარმატებით განასახიერა პლატონ სამანიშვილისა (დ. კლდიაშვილის „სამანიშვილის დედინაცვალი“) და ყვარყვარე თუთაბერის (პ. კაკაბაძის „ყვარყვარე თუთაბერი“) როლები. დადგმული აქვს სხვადასხვა ჟანრისა და სტილის სპექტაკლები. მათ შორის: ი. ვაკელის „რვალი“, დ. ერისთავის „სამშობლო“, ნ. შიუკაშვილის „სულელი“, ა. წერეთლის „ბაში-აჩუკი“, ჯ. პრისტლის „ინსპექტორი მოვიდა“, გ. ბერძენიშვილის „ტირიფის ქვეშ“ და სხვ. ვ-მ მთამბეჭდავი სახეები შექმნა

კინოფილმენშიც. ესენია: მღვდელი („ეპისკოპოსი ნადირობაზე“, 1971), ტაგუია („მამლუქი“, 1958), არჩილი („განგაში“, 1968), ყარამანი („ტარიელ გოლუა“, 1968), დათეშიძე („ნერგები“, 1972), ერმილე („ჩაძირული ქალაქის მადიებელი“, 1972) და სხვ.

შ. ცუცქერიძე
